

Yoshlar tadbirkorligini qo'llab-quvvatlash uchun 10 mlrd. so'mgacha grant ajratiladi

18/01/2022 - 18:02



“Turizm, madaniyat, madaniy meros va sport sohalarini yanada rivojlantirish uchun qo'shimcha sharoitlar yaratish to'g'risida”gi Prezident Farmoni (PF–52-son, 15.01.2022-y.) qabul qilindi.

Farmonga muvofiq, 2023-yil 1-yanvargacha turizm subyektlari va aviatashuvchilarning xorijdan O'zbekistonga charter reyslari uchun xarajatlarining bir qismi har bir xorijiy turist uchun (kamida 5 kecha tunaganda) 10 AQSH dollari, qishda (20-noyabrdan 20-fevralgacha) esa 25 AQSH dollari miqdorida Davlat byudjetidan qoplab [beriladi](#).

2022-yil 1-maydan yoshlarning tadbirkorligini qo'llab-quvvatlash maqsadida har bir tashabbuskorga 50 mln so'm miqdorida, jami 10 mlrd so'mgacha grantlar ajratiladi.

Bunda grant mablag'lari:

— onlayn to'lovlarni qabul qiluvchi veb-sayt yaratishga, xorijdagi turizm ko'rgazma va yarmarkalarida ishtirok etishga yo'naltiriladi;

— grant mablag'lari xorijdan O'zbekistonga 3 yil kamida 200 nafar turistlar uchun tur tashkil qilish sharti bilan ajratiladi.

Turizm va sportni qo'llab-quvvatlash jamg'armasiga turistik (mehmonxona) yig'imini hisoblash va to'lash 2021-yil 1-sentyabrdan to'xtatilgan.

Shu sababli 2022-yil 1-fevraldan 2023-yil 1-yanvargacha Jamg'armaga har oyda 2,5 mlrd so'm miqdorida qo'shimcha mablag'lar Davlat byudjetidan ajratiladi.

Ushbu mablagʻlar hududlardagi salohiyatli turizm obyekti va maskanlarini turistlar tashrifi uchun tayyorlash va ularni targʻib qilish kabi maqsadlar uchun sarflanadi.

Farmon bilan shuningdek, qadamlar uchun pul toʻlash tartibiga oʻzgartirish kiritildi. Unga muvofiq, endilikda 1 sutkada 10 ming va undan koʻp qadam yurgan 18 yosh va undan katta fuqarolar oʻrtasida yutuqli oʻyinlar oʻtkaziladi.

Har oy yakunida esa yutuqli kuponlar oʻrtasida qimmatbaho sovrinli oʻyinlar oʻtkaziladi.

Ilgari yuqoridagi talablarga mos fuqarolarga kunlik 3 ming soʻmdan toʻlangan.
